

淮海英靈集

八





淮海英靈集

(A)

阮元輯

編主五雲王

編初成集書叢

集靈英海淮

冊八

中華民國二十四年十二月初版

輯者

阮

元

發行人

王

上海河南路

雲五

印刷所

商

上海河南路
務印書館

發行所

商

上海及各埠
務印書館

鎮

淮海英靈集

北湖阮氏詩

烏程陳焯填諱

阮諱世衡字代公。江都生員。居北湖公道橋。元之曾叔祖也。康熙間以子應武官。封武德將軍。

題黃山六景圖效盧鴻十志體

始信峯峯高七百九十仞。亭亭獨上。巖如天柱。上有仙石橋。以通南峯磴道。

渺天外兮高峯矗。離絕松雲立於獨。抗澗山。軼底柱。屹崒巍。我通玉宇。遊氣高。襄始信峯。碧玉簪。青芙蓉。一上七百九十仞。仙橋長兮石磴峻。冥觀萬象投虛刃。

鳴絃泉源出雲門峯。湍飛千尺。下注琴石。鏗然有聲。

煙嵐碧兮雲濤翠。仙風縹緲琴音邃。望九疑。想九成。鈞天一曲留太清。湍流千尺鳴絃泉。注琴石。聲鏗然。秋煙一碧飛不著。帶長薄兮翔孤鶴。能移我情此澗壑。

鍊丹臺臺在鍊丹峯頂。曠衍如坪。可容萬人。俯視絕壑。深不可測。

挹元玉兮漱華池。乘風欲與仙人期。迎洪崖。贈瑤草。奇情自寄烟霞表。曠衍如坪鍊丹臺。通顯氣。軼浮埃。丹成九轉巖霞絕。俯絕壑兮不可測。凌虛自有雲霄翼。

天海菴菴當海門峯半。每雲氣蒸騰。彌滿山谷。光煜煜而勢洋洋。茲菴全攬其勝。

噴煙雲兮積瀕洞。海門峯半能虛控。瀾黛壑蒸翠微。千霞照日開林霏。獨擅其奇天海菴。振金策。老瞿曇。紅翠澄鮮落溟海。水潺湲兮石硯磔。此中彷彿仙真在。

祥符寺寺建紫石峯下。唐志。滿禪師刹也。羣峯聳秀。湯泉出焉。後望磴道。即入山初徑。

紫石峯兮訝挺拔。志滿當年留古刹。披蕙幌。掩雲關。珍珠漢出溫湯泉。紆迴初入祥符寺。香界天。金布地。有冥搜者在此中。蕩遺慮兮發遊蒙。六塵五蓋歸虛空。

石筍矸類水菴右。怪石林立。自始信峯望之。直如兒孫羅列耳。

披荒榛兮陟峭嶸。矛戟森森天際落。茁犢角。挺霜鋒。衡巫雕刻窺重重。兒孫羅列石筍矸。金碧潭。玉女窗。始信峯前望何遠。匪高人兮肯偃蹇。萬疊松濤去忘返。

阮諱玉堂嘉慶丁巳春。吾浙學使。閣學士少宗伯。阮芸臺先生。出其祖招勇將軍行狀。及遺稿見示。附刊淮海英靈集中。祖德克彰。誠盛舉也。按狀云。太府君諱玉堂。字履庭。號琢菴。始祖諱嚴。當明神宗時。由江南

淮安山陽。遷揚州江都。明末。遷居城北四十里湖中公道橋。二世祖諱國祥。例贈明威將軍。高祖諱文廣。任榆林衛正兵千戶。曾祖諱秉謙。以孫諱匡衡公官。贈武德將軍。祖諱樞良。晉贈招勇將軍。父諱時衡。誥封奉政大夫。晉贈招勇將軍。凡五世。皆有隱德。太府君生而倜儻有志概。長身健臂。行止偉岸。與中人立。頂僅及胸。少能挽強馳射。矢無虛發。尤喜讀書。為古文詞詩歌。援筆立就。康熙五十年辛卯。占籍儀徵。鄉試中式武舉人。主試者為江蘇巡撫。儀封張清恪公伯行。會劾奏本科文鄉試交通關節事。總督反奏。解巡撫職。遷之揚州館舍。太府君於是佩刀挾矢護左右。同寢食數月。及後奉旨昭雪。復巡撫職。清恪公極感太府君之義。而太府君諱書勵行。一生清介。所以深得清恪公教者。亦多在此時。五十四年乙未。武會試中式。殿試三甲。賜同進士出身。分隸藍旗教習。五十六年。五十七年。聖祖仁皇帝駕幸熱河。兩次隨扈。五十八年。授藍翎侍衛。雍正元年二月

· 蒙世宗憲皇帝。賞級三正。三月。送聖祖仁皇帝梓宮。賞銀四十兩。八月。送太皇太后梓宮。加一級。本年癸卯科。殿試武進士。詔舉技師。馬箭步箭皆稱旨。賞級三正。銀五十兩。十二月。授三等侍衛。賞戴花翎。三年五月。引見。外放湖北撫標中軍遊擊。兵部給都司簽書。管湖北撫標中軍遊擊。兼管左營事。及涖任。兼署右營。馭士嚴整有律。具為稱職。五年八月。遭父喪。遵例在任奉諱。服除。十年三月。部議改設撫標中軍遊擊員缺。為參將。經大將軍岳鍾琪。以軍前才能之員揀補。仍留軍前効力。太府君署理參將印務。十月軍政卓異。十一年六月。引見。奉旨准其卓異。交部照例陞用。欽此。十二年四月。以都司銜陞銜。調補廣東提標後營遊擊。時巡撫德齡。奏請以陞銜仍留湖北。署撫標中軍印務。奉旨著照該撫所請行。欽此。雍正十三年十一月。恭逢恩詔。加一級。乾隆元年正月。兼署右營遊擊。三月。中軍參將到任交卸。旋署興國營參將。七月。始改署苗疆九谿營。遊擊。二年。奉旨諭督撫各據所知之人。秉公保舉。湖廣總督史貽直。保舉阮某。才守兼優。奏准紀錄一次注冊。五年五月。湖南城步綏寧兩縣。苗民數萬人。盤踞山谷。接辰州數百里。殺傷官兵。肆出劫掠。道路不通。奉檄領九谿。澧州。洞庭。常德。共四協營官兵。隨鎮軍總兵劉策名。晝夜掩勦。兵駐三界溪。苗悉精銳屯山口。因即相度地勢。偵探賊情。六月六日。進攻薄賊寨。太府君身先士卒。遠施鎗礮。近接刀矢。斃賊甚多。賊大奔潰。遂乘勝奮殺。焚燒山寨。奪獲糧草器械。三界溪為賊門戶。故賊屯此為最勦。自官兵大捷後。賊退保各寨。其勢遂分。提督杜凱報捷。奉硃批。這所奏欣悅覽之。將士奮勇爭先。甚為可嘉。俟事竣之日。從優議敘。欽此。閏六月四日。攻入樹寨。克之。追殺數里。巢穴焚燬殆盡。七月二十二日。攻長安鹽井口客寨。飛毛坪。龍家溪。竹林各寨。皆次第克之。此五寨地勢險隘。林箐深密。太府君步行率士卒。冒矢石。敗其伏兵。鼓銳力戰。遂於一日中連克之。賊勢已大潰。因駐兵搜捕山箐。焚燬茅蓬。發獲糧米甚多。是時上慮兵權未一。命貴州總督張廣泗。駐兩湖。總制全軍。甫到城步。即察知謀勇最著。資級二聯。勞獎極力。南山大箐。屯賊正多。屢攻未克。總督令督各營兵進勦。賊積木石斷山路。以布縛膝。進入。太府君日率兵伴攻正道。探知間道。夜率健卒五百人。攀藤越嶺而入。誤墜阮傷膝。流血滿足。以布縛膝。進益力。夜半及正道。徹開木石。是時賊數千人已覺來拒。鳥鎗繩火。紛如亂螢。太府君命兵負礮偃伏。藤牌護前。賊至鎗齊發。我兵寂不動。賊易之。乃鳴一大礮。鼓兵直下如建瓴。賊眾敗散。而正道兵無木石阻。亦大進合勦。殺獲甚多。及曉。搜獲龍褲刀標鎗等器械。及糧草無算。又搜得前被賊殺之巡檢官印一顆。賊餘黨共八百戶。退據南嶺。糧盡不支。間出數十人。近營跪哭乞降。太府君察其誠。為請於總督。總督云。一願。設賊詐。汝當此咎耶。太府君以死任之。次日。率賊眾近總督大營。跪乞降。總督云。發三礮不叫去。乃真降耳。乃對眾發三大礮。斃數十人。餘眾股栗。莫敢。側轉蓋感太府君拯護之恩。故忍死無負如此。總督於是始受降。是時各山賊寨亦並破。老幼退保入橫坡。八月二十二日。奉令領各營兵相機督勦。總督又令遊擊區明李登華。帶兵隨太府君進勦橫坡。山梁險隘。正路不能攻。九月二十八日。率兵由左路山梁奮登。奪殺前進。遂入寨中。鎗礮齊發。賊精銳殆盡。遂大敗。焚燬居室一空。生擒男婦子女。

二千餘人。賊寨盡平。十月初三初四日。復親督各營兵。於橫坡各山箐。四面搜捕。生擒男婦子女千餘人。又搜獲窟室男婦數百人。刀杖銀帛無算。皆親解赴總督所。總督欲盡誅其生口。太府君再四諫阻不從。不得已。乃請曰。壯夫能執兵抗師者。當殺之。其婦女及男子十六歲以下者。必宜赦免。總督始如所請。太府君出營分別男女年歲。苗人環跪。哭聲震山谷。先擇壯年有鬚者斬之。其餘全活。薙髮給以口糧。總督雅知賢能。不深求。仍獎勵有逾諸將。太府君奉令所勦之賊寨。前後十餘戰。皆謀勇並著。兵無少挫。功為諸將最。攻戰稍暇。即賦詩較射以為樂。各寨平後。徹兵回九谿營。總督班第具題。奉旨分別等次。交部議敘。十一年。兵部議敘。頭等軍功加銜一等。隨帶軍功紀錄二次。八月。為苗疆事宜保舉。十三年。推陞河南衛輝營參將。九月。任太府君之在九谿也。訓練勤而兵無虛額。賞重而罰嚴。故湖南勁旅。以九谿為最。城綏之役。有兄弟皆為兵。因母老例泰一人。兄弟爭出。太府君泣事。限期操練。而自役於署中。其有勇知方如此。及至衛輝。營務廢壞已極。兵質而惰。弓矢朽折不可用。太府君泣事。限期操練。而自役於署中。其有勇知方如此。及至衛輝。營務廢壞已極。兵質而惰。弓矢大吏舉劾。奉旨交部議處。部議革職回籍。家無一畝田。蕭然傲居郡城。而湖山寄興。詩酒頗自娛也。十六年。聖駕南巡。跪迎於高旻寺。甫奏名。上在舟中問曰。可是鄂容安所參者。謹對曰是。旋奉旨以都司錄用。以微臣姓名。聖心不忘於數年之後。由此見皇上愛惜人材。神慮周密。纖細不遺。太府君每言之。未嘗不感恩泣下也。十七年四月。補放廣東羅定協都司。二十二年。陞廣東欽州營遊擊。太府君之往嶺南也。以卑濕故。未奉母周太淑人之任。及至欽州。多受瘴氣病足。夢寤中語多念慈闈。屢欲告養歸。周太淑人諭止之。未果。於二十四年十月十六日。卒於任所。兵民哭之失聲。太府君性剛介。接奉各督撫。尊卑盡禮之外。言語辭色。無少附屈。於僚屬事。多為保全。不以告人。受者久而知感。所至凡鹽權一切陋習。皆裁奏。懷金者不敢造門。太府君未第時。家素裕。備宿衛後將十年。田舍鬻盡。及外遷。愈廉介自矢。家無一日儲。不計也。九谿城北有北山。周數十里。兵民皆仰給此山。有明季指揮豪姓之子孫。訟言山本指揮舊地。總督委官勘審。將為所奪矣。乃慨然入省申辨。過洞庭湖。舟覆。賴商船救得出。至省。力言地即豪姓地。亦明代事。且絕數萬家之葬。樵芻牧。而以資豪姓為利蔽。大不便。總督即違前議。從太府君議。九谿兵民大感悅。偶騎而出。見木石委積。詢知將謀建生祠。太府君立斥徹之。兵民不得已。家祀一主。乾隆四十三四年間。元父客漢上。遇九谿老兵。為言太府君去後。此祠旋立。歲時祝之不衰。所著有珠湖草堂詩集三卷。琢菴詞一卷。箭譜一卷。陣法二卷。太府君生康熙三十四年。距卒得年六十有五。初授奉政大夫。乾隆元年。晉階招勇將軍。卒後歸自欽州。入城治喪。二十五年。葬於揚州府城北雷塘中壩。以元配汪淑人。繼配江淑人合祔。嘉慶元年。以元官誥贈資政大夫。內閣學士兼禮部侍郎。配並晉贈夫人。按吾阮氏。世以武起家。自元之生獨弱。習馳射力。輒不支。父固憐之。命改就經業。暇時為元述太府君平苗之捷。曰。是役也。奇績聞當世。然妣江夫人怛然內傷。寢食不安者十閱月。比事捷。言之猶悻。故予弛騎射不事。今復以命汝。成江夫人志也。元謹志之未敢忘。比元入翰林。充國史館纂修官。檢閱長編。太

府君官階戰績·稍具其略·乾隆乙卯·嘉慶丙辰間·元視學山東浙江·校閱少暇·復以趨庭之訓·比次追述·用紀梗概·託立言之君子·圖不朽焉·孫元謹狀·屬吏烏程陳焯·敬承先生命·錄略填諱·

庚戌仲冬借吳陞瞻登洪山

人影小亭外·蒼茫對夕暉·山明寒月上·樹靜晚風微·斷草迷樵逕·荒烟暗野扉·離愁終莫釋·把酒且休歸·

楊荆山過武昌阻雪留贈和韻

風雪滿江漢·驅寒仗酒力·舉觴勸故人·聊以壯行色·

春殘

不欲春歸去·無如日漸長·雨殘高柳重·風定落花香·寂寞宜詩酒·流連惜景光·遂初何日賦·心事半江鄉·

九日讌同人於見仁亭

佳時重九日·况復是良朋·詩健聯三益·亭高試一登·山空秋葉下·城遠暮煙凝·莫漫輕歸去·茱萸醉未曾·

題靈壽杖

亦名萬壽藤·產於均山·襄陽守尹公見貽·喜其體直而性柔·因題以句·

均山鍾秀似青藜·太守遙貽待我題·精幹正堪膺重遠·他時歸老藉扶攜·

秋夜

秋天暑氣平·秋月夜深明·露浥蓮房冷·風過竹牖清·蛩音近西壁·雁侶卻南征·不寐多枵觸·誰知此際情·

江干夕照和韻

楚江流浩渺。夕照下平沙。翠靚山頭樹。光搖水面霞。歸帆明葉葉。羣牧散斜斜。燕坐恣遊日。頻聞噪暮鴉。

秋鶯和韻

既愛春光復愛秋。依然坐柳嘯歌喉。聲聲睨皖撩人思。鼓吹針砭正未休。

荷華

不畏污泥烈日烘。天然品格碧波中。高名豈借濂溪重。香遠原餘君子風。

暮春有感

暮春天氣半陰晴。花落花開是物情。要識榮枯前已定。放開眼界看芸生。

秋夜

臥看天邊銀漢斜。流鶯飄瞥過隣家。蛩聲唧唧催秋老。碧沼殘荷露泣花。

梧桐

滿院梧桐鏤碧雲。不須洗濯卻塵氛。幾枝曾伴高岡鳳。一葉還封大國君。

秋夕偶成

淒其風雨早秋天。輪轉愁腸攪夜眠。宦海波濤行處有。呼來歡伯與陶然。

次韻袁紹三雨中遣悶

芭蕉滴滴響秋階。及榻連牆長綠苔。赤馭白爲雲掩去。商羊能使雨頻來。宦情淡處同花妥。詩思清時勝
霽開。愛我同袍善排遣。未曾根觸笛聲哀。

書懷

勛業如何得大還。順時知命歷諸艱。放懷且飲花前酒。極日常看月下山。孰謂遽尋高士樂。算來終讓老
僧閒。龍鍾四十勞生半。陳迹興懷俛仰間。

八月庭梅忽放一枝

金風忽破一枝梅。香滿庭階蝶夢猜。瘦影應隨寒月淨。孤芳何逐素秋來。若辭白雪難爲友。或愛黃華故
作媒。折寄隴頭人不信。沈寥天氣一銜杯。

次韻月下菊影

耐霜宜雨更宜晴。瘦影迷離月底生。翠葉頓將濃墨潑。黃花偏就淡烟橫。天流冰魄同消長。雲罨秋宵作
暗明。壁上橫斜闌外轉。只愁催曉漏聲聲。

九日

敢效龍山作勝遊。佳時散步一凝眸。佩萸囊小千家冷。落帽風高萬里秋。酒點菊花香泛泛。歌遲雲影碧
悠悠。半弦月向當頭照。欲去高亭爲小留。

江行夕眺

舟行三十里。不覺夕陽斜。下上依檣燕。參差夾岸花。遠村藏酒市。深火出漁家。唱晚中流急。聲聲雜暮笳。

壬子仲冬入京途中作

驅車八九日。已過十餘城。風勁憐裘敝。霜嚴覺酒輕。寒沙驚馬色。古木動烏聲。不畏征途永。心懸帝闕旌。

過岳鄂王湯陰故里

武穆精忠亘古稀。丹心日月共光輝。獄成三字千秋恨。多少英雄淚濕衣。

春日道中

歸從京國駕征車。非復嚴冬風雪加。嫩綠長隄雙岸柳。新紅小院幾枝花。鶯聲恰恰流歌桁。燕語深深滯酒家。如許春光泥人處。頓忘行役在天涯。

銅雀臺

魏武雄心著鄴城。高臺華侈幾經營。當年勝跡今何有。惟見漳流照舊清。

盧生廟

仙佛無非夢。盧生覺豈真。邯鄲來往者。俱作夢中人。

贈別張洪範協鎮

奕世簪裾孰與爭。早從邗上飲香名。當年績勩關西堡。近日旌移冀北營。叔子風流真可羨。燕然銘勒豈難成。臨江醞酒無他祝。疊被綸言慰梓情。

秋風吟

亭皋木葉起秋聲。紅蓼初殘蘸水清。對此蕭條江路永。感人最是故園情。

舟泊黃州

解纜朝辭黃鶴樓。下春帆影落黃州。橫江白露銜山月。何以蘇公赤壁遊。

登興國廡後容膝亭

城上烟雲淨。湖中葭菼寬。我來切憑眺。容膝易爲安。

富川攝篆

野路山城僻。門臨古富川。周遭雲接嶺。屈曲水通船。民朴勤農事。官清乏酒錢。莫言從薄宦。此處好林泉。
不寐

冷署無人月轉明。早聽八百寺鐘聲。欲眠窗外來斜影。高枕無端夢不成。

滄浪烟雨

一派滄波直接城。虛亭四面碧涵清。烟迷楊柳千重色。雨打芙蓉萬點聲。詩句都從遊興就。酒卮常爲放

懷傾。昔年孺子還同調。不覺行歌濯我纓。

仙觀晴霞

晴空霞氣繞仙壇。雞犬猶傳覺舐丹。道士自通元妙訣。故留餘綺護欄杆。

初莅九谿寄和袁紹三韻

十年都會裏。近日萬山中。要地雖新易。深山與舊同。宦隨溪水淡。心與嶺雲空。踈嬾宜幽僻。差安淳朴風。

次韻劉茲受雨後對月

獨愛初秋夜。炎威雨後平。竹梢移月影。蕉葉弄風聲。遠岫當軒淨。長溪入耳清。十年羈鄂渚。到此遂幽情。

秋夜

步履徐徐度小廊。秋深竹塢過來涼。山中月色明如晝。清氣疑時草木香。

秋月

怪爾天邊月。當秋愴我神。北湖千里遠。南楚一官貧。廢堞緣山谷。邊陲雜獠民。公私籌靜夜。草覺側冰輪。

賦得冷露無聲濕桂華

冷露無聲濕桂花。一庭清蔭傍窻紗。濃香聚處更方永。麗色明時月正華。已向廣寒餐玉液。不須絳樹到仙家。夢回觸鼻真無隱。黃雪還看射曉霞。

中秋

三秋已過半。桂魄此宵圓。可愛冰壺澈。何須樺燭然。攀花作清供。把酒續殘篇。永夕山城看。身親玉宇前。

秋夜回文

夜月歸舟晚。蛩鳴落葉飛。榭高來氣爽。林密透風微。

自識

窮通得喪孰先知。自識升沈各有時。夙昔雄心消殆盡。而今宦境淡于詩。

題仙侶洞

無處覓丹臺。嶙峋一穴開。乘龍何日去。跨鶴幾時迴。紫府溪山曲。元都索水隈。吾儕寧絕粒。也得暫徘徊。

次韻袁紹三九日風雨

重陽傳令節。風雨冷清清。但覺黃花瘦。誰知紫蟹橫。林疎迷嶺路。灘急壯濤聲。舉目悲秋老。難忘故土情。

軍營和田人二真詩韻

松亭愁溽暑。溪月喜新涼。妙語仙凡別。焉能較短長。

次韻韋總戎軍營感懷

邊徼身經第一秋。西風鼓角幾時休。山間壁壘連雲築。林外旌旗帶雨收。但覺此生心坦白。終須元老樹

謀猷請君試看軍行際。頃刻安危動我愁。

秋日軍營寄韋總戎袁紹三。

風風雨雨苦無休。欲使征夫白盡頭。但使北堂慈竹好。平安之外復何求。

橫坡紀勝

橫坡負固幾多年。劫殺頻頻不畏天。今日王師彰捷伐。魚遊釜底少生全。

軍營雜感

瘴雨連綿澗水潺。星羅行帳駐崇山。但期醜類歸王化。誰計艱辛幾月間。

苦雨淒風那不聞。寒威漸逼尙行軍。病軀黽勉猶從事。不到平蠻不策勳。

次韻薛協鎮軍務告竣雪霽對月。

積雪千岩與萬巒。月光暎射白成團。談深清夜都忘倦。飲傍紅爐不畏寒。故壘重重閒秣馬。軍聲寂寂靜聞灘。穹廬一碧明如晝。淨掃蠻烟黎庶安。

次韻薛協鎮凱旋偕行。

雪消雲淨喜班師。策馬偕行笑語時。戎務一心勤到底。世情滿眼任如絲。愁來解釋依紅友。興到吟哦愛白詩。邊境廓清民復業。往來八月未爲遲。

和韋總戎軍營寫懷二首

觸蠻聯楚粵。天討壯三軍。恍似西風起。驅除萬里雲。
轉戰懸軍入。身先矢石中。但能無喪失。不欲尙奇功。

師還

師行紆八月。十戰楚南陲。勝負何能料。安危不可知。
皇威能遠屆。臣職盡當爲。每到艱虞處。吁嗟繫我思。

庚申除夕

南楚歸來日。青陽逼歲時。一杯除夕酒。奠爾死綏知。

春雨

彼穠桃李雨爲讎。待到晴時花已休。對物言情人亦病。豈緣賦命本窮愁。

早蛩

唧唧蛩吟入夏時。羽書旁午使神馳。不堪不寐閒牕下。聽爾頻添酒數卮。

次韻溪城觀漲

積雨連朝夜。千山水匯川。奔騰欲浮樹。泛濫遂侵田。舟疾金梭擲。灘平雪浪旋。沙鷗偏泛泛。徒倚戍樓邊。

和醉翁韻二首

吾亦杖頭挂百錢。陶然常向酒家眠。那堪吏部常翻甕。無那翰林不上船。清俸何堪乞酒錢。閒來消遣對愁眠。好將歲月催三雅。莫計他年屋住船。

醉仙二首

茅屋蕭疎八九椽。依山傍水合天然。琴書以外無長物。鶴髮童顏一醉仙。山深水曲翳雲烟。長買風光不用錢。此老胸中涵萬有。莫教錯認酒中仙。

端午

角黍爭嘗日午。龍舟競渡天中。世上徒娛兒女。古來誰哭英雄。

題九谿麻壁

官閒緣地僻。不似武昌時。角勝三杯酒。淡兵一局棋。軍民喜和輯。升斗望經持。更有開顏處。香山長慶詩。

次溪晚韻

政簡饒清興。溪平類落潮。汀煙籠翠竹。珠露上青苗。把卷南榮暗。銜杯北海招。山城無限趣。峯疊水源遙。

晚興

寂寂溪城亦在公。公餘午後覺心空。踈狂酒興聯吟裏。斷續碁聲落照中。老樹嵐披殘靄碧。歸禽影帶斷